

梅溪詞一卷

史達祖

題梅溪詞

關雎而下三百篇。當時之歌詞也。聖師刪以爲經。後世播詩章於樂府。被之金石管絃。屈宋班馬。繇是乎出。而自變體以來。司花傍輦之嘲。沈香亭北之詠。至與人主相友善。則世之文人才士。遊戲筆墨於長短句間。有能瓌奇警邁。清新閒婉。不流於詭蕩汗淫者。未易以小伎言也。余掃軌林扃。草長門徑。一日聞剝啄聲。園丁持謁入。視之。汴人史生邦卿也。迎坐竹陰下。郁然而秀整。俄起謂余曰。某自冠時。聞約叅之號。今亦既有年矣。君身益湮晦。達以是來見。無他求。袖出詞一編。余驚笑而不答。生云。始取讀之。大凡如行帝苑仙瀛。輝華絢麗。欣盼駭接。因掩卷而嘆曰。有是哉。能事之無遺恨也。蓋生之作。辭情俱到。織綃泉底。去塵眼中。妥帖輕圓。特其餘事。至於奪茗豔於春景。起悲音於商素。有瓌奇警邁。清新閒婉之長。而無詭蕩汗淫之失。端可以分鑣清真。平睨方回。而紛紛三變行輩。幾不足比數。山谷以行誼文章。宗匠一代。至序小晏詞。激昂婉轉。以伸吐其懷抱。而楊花謝橋之句。伊川猶稱可之。生滿襟風月。鸞唵鳳獻。鏘洋乎口吻之際者。皆自漱滌書傳中來。況欲大肆其力於五七言。迴鞭溫韋之塗。掉鞅李杜之域。躋攀風雅。一歸於正。不於是而止。雖然。余方以耽泥聲律。而顛踣擯棄。今又區區以勉生。非惑耶。若覽斯集者。不楛於玄黃牝牡。哀沈而悼未遇。實繫時之所尙。余老矣。生鬚髮未白。數路得人。恐不特尋美於漢生姑待之。生名達祖。邦卿其字云。嘉泰歲辛酉五月八日。張鑑功甫序。

梅溪詞

目錄

- | | | |
|--------|---------|---------|
| 綺羅香一調 | 雙雙燕一調 | 陽春曲一調 |
| 海棠春令一調 | 夜行船一調 | 東風第一枝三調 |
| 玉樓春二調 | 喜遷鶯一調 | 萬年歡一調 |
| 阮郎歸二調 | 眼兒媚二調 | 憶瑤姬一調 |
| 南歌子一調 | 風流子二調 | 金盞子一調 |
| 杏花天四調 | 三姝媚一調 | 壽樓春一調 |
| 子飛樂一調 | 南浦一調 | 探芳信一調 |
| 祝英臺近三調 | 敘頭風一調 | 西江月四調 |
| 慶清朝一調 | 桃源憶故人二調 | 花心動一調 |
| 解佩令一調 | 菩薩蠻三調 | 賀新郎五調 |
| 夜合花二調 | 留春令二調 | 瑞鶴仙二調 |
| 點絳脣二調 | 青玉案一調 | 浣溪沙一調 |
| 蝶戀花一調 | 臨江仙三調 | 漢宮春一調 |
| 蘭陵王一調 | 風入松一調 | 隔浦蓮二調 |

宋六十名家詞

二

鳳來朝一調

玉簫涼一調

鷓鴣仙一調

湘江靜一調

玲瓏四犯二調

八歸一調

過龍門二調

玉蝴蝶一調

齊天樂五調

燕歸梁二調

月當廳一調

秋霽一調

滿江紅三調

戀繡衾三調

換巢鸞鳳一調

惜奴嬌一調

龍吟曲三調

鷓鴣天四調

惜黃花一調

玉燭新一調

一翦梅二調

醉落魄二調

醉公子一調

步月一調

梅溪詞

宋 史達祖

綺羅香（詠春雨○或作沁園春非）

做冷欺花。將煙困柳。千里偷催春暮。盡日冥迷。愁裏欲飛還住。驚粉重、蝶宿西園。喜泥潤、燕歸南浦。最妨它、佳約風流。釧車不到杜陵路。沈沈江上望極。還被春潮晚急。難尋官渡。隱約遙峯。和淚謝娘眉嫵。臨斷岸、新綠生時。是落紅、帶愁流處。記當日、門掩梨花。翦燈深夜語。

雙雙燕（詠燕）

過春社了。度簾幕中間。去年塵冷。差池欲住。試入舊巢相並。還相雕梁藻井。又軟語商量不定。飄然快拂花梢。翠尾分開紅影。芳徑芹泥雨潤。愛貼地爭飛。競誇輕俊。紅樓歸晚。看足柳昏花暝。應自棲香正穩。便忘了、天涯芳信。愁損翠黛雙蛾。日日畫闌獨凭。

陽春曲

杏花煙。梨花月。誰與暈開春色。坊巷曉悄悄。東風斷。舊火銷處近寒食。少年蹤迹。愁暗隔。水南山北。還是寶絡雕鞍。被鶯聲喚來香陌。記飛蓋西園。寒猶凝結。驚醉耳。誰家夜笛。燈前重簾不挂。殢華裾粉淚曾拭。如今故里信息。賴海燕。年時相識。奈芳草正鎖江南夢。春衫怨碧。

海棠春令

似紅如白含芳意。錦宮外。煙輕雨細。燕子不知愁。驚墮黃昏淚。燭花偏在紅簾底。想人怕春寒正睡。夢著玉環嬌。又被東風醉。

夜行船（正月十八日聞賣杏花有感）

不翦春衫愁意態。過收燈。有些寒在。小雨空簾。無人深巷。已早杏花先賣。白髮潘郎寬沈帶。怕看山。憶它眉黛。草色拖裙。煙光惹鬢。常記故園挑菜。

東風第一枝（詠春雪）

巧沁蘭心。偷黏草甲。東風欲障新暖。漫疑碧瓦難留。信知暮寒輕淺。行天入鏡。做弄出、輕鬆纖軟。料故園、不捲重簾。誤了乍來雙燕。青未了。柳回白眼。紅欲斷。杏開素面。舊遊憶著。山陰厚盟。逶迤妨上苑。寒爐重暖。便放慢、春衫針線。恐鳳靴。挑菜歸來。萬一灞橋相見。

又（壬戌開臘望雨中立癸亥春與一高賓王各賦）

草脚愁蘇。花心夢醒。鞭香拂散牛土。舊歌空憶珠簾。綵筆倦題繡戶。黏雞貼燕。想立斷、東風來處。暗惹起、一掬相思。亂若翠盤紅縷。今夜覓、夢池秀句。明日動、探花芳緒。寄聲沾酒人家。預約俊遊伴侶。憐它梅柳。乍忍俊、天街酥雨。待過了、一月燈期。日日醉扶歸去。

又（燈夕清坐○或作元夕）

酒館歌雲。燈街舞繡。笑聲喧似簫鼓。太平京國多歡。大酺綺羅幾處。東風不動。照花影、一天春

聚耀翠光。金縷相交。苒苒細吹香霧。羞醉玉。少年丰度。懷豔雪。舊家伴侶。閉門明月關心倚。窗小梅索句。吟情欲斷。念嬌俊。知人無據。想袖寒。珠絡藏香。夜久帶愁歸去。

玉樓春(社前一日)

游人等得春晴也。處處旗亭堪繫馬。雨前穠杏尙娉婷。風後殘梅無顧藉。忌拈針線還逢社。鬥草羸多裙欲卸。明朝雙燕定歸來。叮囑重簾休放下。

又(賦梨花)

玉容寂寞誰爲主。寒食心情愁幾許。前身清淡似梅妝。遙夜依微留月住。香迷蝴蝶飛時路。雪在鞦韆來往處。黃昏著了素衣裳。深閉重門聽夜雨。

喜遷鶯

月波疑滯。望玉壺天近。了無塵隔。翠眼圈花。冰絲織練。黃道寶光相直。自憐詩酒瘦。難應接。許多春色。最無賴。是隨香趁燭。曾伴狂客。蹤跡漫記憶。老了杜郎。忍聽東風笛。柳院燈疎。梅廳雪在。誰與細傾春碧。舊情拘未定。猶自學當年游歷。怕萬一。誤玉人夜寒簾隙。

萬年歡(春思)

兩袖梅風。謝橋邊。岸痕猶帶陰雪。過了匆匆燈市。草根青發。燕子春愁未醒。誤幾處。芳音遼絕。煙谿上。采綠人歸。定應愁沁花骨。非干厚情易歇。奈燕臺句老。難道離別。小徑吹衣。曾記故

里風物。多少驚心舊事。第一是。侵階羅襪。如今但。柳髮晞春。夜來和露梳月。

阮郎歸

龍香吹袖白藤鞭。帽簷衝柳煙。一春幾度畫橋邊。東風聽箏絃。花活計。酒因緣。從人嘲少年。真須吟就綠楊篇。灣頭寄小憐。

又(月下感事)

舊時明月舊時身。舊時梅萼新。舊時月底似梅人。梅春人不春。香入夢。粉成塵。情多多斷魂。芙蓉孔雀夜溫溫。愁痕卽淚痕。

眼兒媚(寄贈)

潘郎心老不成春。風味隔花塵。簾波浸筍。窗紗分柳。還過天津。近時無覓湘雲處。不記是行人。樓高望遠。應將秦鏡。多照施顰。

又(代答)

兒家七十二鴛鴦。珠珮鎖瑤箱。期花等月。秦臺吹玉。賈袖傳香。十年白玉堂前見。直是翦柔腸。將愁去也。不成今世。終誤王昌。

憶馭姬(騎省之悼也)

嬌月籠煙。下楚嶺香分。兩朵湘雲。花房時漸密。弄杏牋初會。歌裏殷勤。沈沈夜久。西窗。屢隔蘭

燈幔影昏。自綵鸞飛入芳巢。繡屏羅薦粉光新。十年未始輕分。念此飛花。可憐柔脆銷春。空餘雙淚眼。到舊家時節。漫染愁巾。神仙說道凌虛。一夜相思玉樣人。但起來梅發窗前。哽咽疑是君。

南歌子

采綠隨雙槳。看山藉一筇。關南桃樹幾番紅。昨夜詩情頻在。雨聲中。花徑無雲隔。苔垣只夢通。舊歡一餉可過從。試覓鴛鴦新杏。簡春風。

風流子

紅樓橫落日。蕭郎去。幾度碧雲飛。記窗眼遞香。玉臺妝罷。馬蹄敲月。沙路人歸。如今但。一鴛通信息。雙燕說相思。入耳舊歌。怕聽琴縷。斷腸新句。羞染烏絲。相逢南溪上。桃花嫩。嬌樣淺澹羅衣。恰是怨深腮赤。愁重聲遲。悵東風巷陌。草迷春恨。輾塵庭戶。花悞幽期。多少寄來芳字。都待還伊。

又

飛瓊神仙客。因遊戲。誤落古桃源。藉吟牋賦筆。試融春恨。舞裙歌扇。聊應塵緣。遣人怨。亂雲天一角。弱水路三千。還因秀句。意流江外。便隨輕夢。身墮愁邊。風流休相悞。尋芳蹤來晚。尙有它年。只爲賦情不淺。彈淚風前。想霧帳吹香。獨憐奇俊。露杯分酒。誰伴嬋娟。好在夜軒涼月。空

自團圓。(月軒其號也)

金盞子

獎綠催紅。仰一番膏雨。始張春色。未踏畫橋煙。江南岸。應是草穠花密。尙憶濺裙蘋溪。覺詩愁相覓。光風外。除是倩鶯煩燕。漫通消息。梨花夜來白。相思夢。空闌一林月。深深柳枝巷陌。難重遇。弓彎兩袖雲碧。見說倦理秦箏。怯春蔥無力。空遺恨。當時留秀句。蒼苔蠹壁。

杏花天(清明)

軟波拖碧。蒲牙短。畫橋外。花晴柳暖。今年自是清明晚。便覺芳情較懶。春衫瘦。東風翦翦。過花塢。香吹醉面。歸來立馬斜陽岸。隔岸歌聲一片。

又

古城官道。花如霞。便恰限。花間再見。雙眉最現。愁深淺。隔雨春山兩點。回頭但垂楊帶苑。想今夜。銅駝夢遠。行人去了鶯聲怨。此度關心未免。

又

細風微月垂楊院。記年少。春愁一點。棲鶯未覺花梢顫。踏損殘紅幾片。長安共日邊近遠。况老去。芳情漸減。屏山幾夜春寒淺。卻將因而夢見。

又

扇香曾靠腮邊粉。舊塵埋。月輪有暈。南風未似愁來近。前事臨窗隱隱。涼花畔。雲歌露飲。夢斷了。終難再問。鴛鴦帶上三生恨。將淚揩磨不盡。

三姝媚

煙光搖縹瓦。望晴簷多風。柳花如灑。錦瑟橫牀。想淚痕塵影。鳳絃常下。倦出犀帷。頻夢見。王孫驕馬。諱道相思。偷理綃裙。自驚腰袂。惆悵南樓遙夜。記翠箔張燈。枕肩歌罷。又入銅駝。徧舊家門巷。首詢聲價。可惜東風。將恨與閒花俱謝。記取崔徽模樣。歸來暗寫。

壽樓春（尋春服感念）

裁春衫尋芳。記金刀素手。同在晴窗。幾度因風殘絮。照花斜陽。誰念我。今無腸。自少年。消磨疎狂。但聽雨挑燈。歌牀病酒。多夢睡時妝。飛花去。良宵長。有絲闌舊曲。金譜新腔。最恨湘雲人散。楚蘭魂傷。身是客。愁爲鄉。算玉簫猶逢韋郎。近寒食。人家相思未忘。蘋藻香。

于飛樂（登鸞怨曲）

綺翼翩翩。問誰常借春陂。生愁近渚風微。紫山深。金殿暖。日暮同歸。白頭相守。情雖定。事却難期。帶恨飛來。煙埋秦草。年年枉夢紅衣。舊沙間。香頸冷。合是單栖。將終怨魂。何年化。連理芳枝。

南浦

玉樹曉飛香。待倩它、和愁點破妝鏡。輕嫩一天春。平白地、都護雨昏煙暝。幽花露溼。定應獨把闌干凭。謝屐未蠟。安排共、文鴛重遊芳徑。年來夢裏揚州。怕事隨歌殘。情趁雲冷。嬌盼隔東風。無人會。鶯鶯燕燕。中心在。深盟縱約。盡同晴雨。全無定。海棠夢在。相思過。西園鞦韆紅影。

探芳信

謝池曉。被酒滯春眠。詩縈芳草。正一階梅粉。都未有人掃。細禽啼處東風軟。嫩約關心早。未燒燈。怕有殘寒。故園稀到。說道試妝了。也爲我相思。占它懷抱。靜數窗檣。最懽聽。鶻聲好。半年白玉臺邊話。屢見鉤小。指芳期。夜月花陰夢老。

祝英臺近(或在第九句阻幽會下分段下二闕做此)

柳枝愁。桃葉恨。前事怕重記。紅藥開時。新夢又溼。此情老去須休。春風多事。便老去。越難回避。阻幽會。應念偷翦酴醾。柔條暗縈繫。節物移人。春暮更憔悴。可堪竹院題詩。蘇階聽雨。寸心外。安愁無地。

又(薔薇)

綰流蘇。垂錦綬。煙外紅塵逗。莫倚莓牆。花氣礮如酒。便愁醺醉青虬。蜿蜿無力。戲穿碎。一屏新繡。漫懷舊。如今姚魏俱無。風標較消瘦。露點搖香。前度翦花手。見郎和笑拖裙。匆匆欲去。驚忽地。賈留芳袖。

又

落花深。芳草暗。春到斷腸處。金勒驕風。欲過大隄去。翠樓萬嶺西邊。恰如會約。畫闌映。一枝瓊樹。正凝佇。芳意欺月。矜春。渾欲便偷許。多少鶯聲。不敢寄愁與。謝郎日日西湖。如今歸後。幾時見。倚簾吹絮。

釵頭鳳(向刻清商怨誤○寒食飲綠亭)

春愁遠。春夢亂。鳳釵一股輕塵滿。江煙白。江波碧。柳戶清明。燕簾寒食。憶憶憶。鶯聲曉。簫聲短。落花不許春拘管。新相識。休相失。翠陌吹衣。畫樓橫笛。得得得。

西江月(閨思)

西月澹窺樓角。東風暗落簷牙。一燈初見影窗紗。又是重簾不下。幽思屢隨芳草。閒愁多似楊花。楊花。楊花。芳草徧天涯。繡被春寒夜夜。

又(賦木犀香數珠)

三十六宮月冷。百單八顆香懸。只宜結贈散花天。金粟分身顯現。指嫩香隨甲影。頸寒秋入雲邊。未忘靈鷲舊因緣。贏得今生圓轉。

又

一片秋香世界。幾層涼雨闌干。青天不惜爛銀盤。借與先生為勸。酒喚詩來酒外。人言身在

人間如何得似碧雲閒。且共嫦娥相伴。

又（舟中趙子楚有詞見調卽意和之）

裙摺綠羅芳草。冠梁白玉芙蓉。次公筵上見山公。紅綬欲啣雙鳳。已向冰奩約月。更來玉界乘風。凌波襪冷一尊同。莫負彩舟涼夢。

慶清朝

墜絮葦萍。狂鞭孕竹。偷移紅紫池亭。餘花未落。似供殘蝶經營。賦得送春詩了。夏帷擯斷綠陰成。桑麻外。乳鳩穉燕。別樣芳情。荀令舊香易冷。歎俊遊疎懶。枉自銷凝。塵侵謝屐。幽徑斑駁苔生。便覺寸心尙老。故人前度漫丁甯。空相悞。祓蘭曲水。挑菜東城。

桃源憶故人（或刻虞美人影）

雙鴛蹙月天津近。歸後嫩情常剩。燈市一年愁凝。心共梅花冷。網塵洞戶春沈靜。衰盡冶遊情性。羞見素娥嬌影。明似愁鸞鏡。

又（賦桃花）

明霞烘透春機杼。春在明霞多處。我是有詩漁父。一夢秦天古。柳枝巷陌深朱戶。牆外風流一樹。十五年來凝佇。彈盡胭脂雨。

花心動

風約簾波錦機寒。難遮海棠煙雨。夜酒未蘇。春枕猶欹。曾是悞成歌舞。半褰薇帳雲頭散。奈愁
朱不隨香去。儘沈靜文園更渴。有人知否。懶記溫柔舊處。偏只怕。臨風見他桃樹。繡戶鎖塵
錦。瑟空絃。無復畫眉心緒。待拈銀管書春恨。被雙燕替人言語。意不盡。垂楊幾千萬縷。

解佩令

人行花塢。衣沾香霧。有新詞。逢春分付。屢欲傳情。奈燕子。不曾飛去。倚珠簾。詠郎秀句。相思
一度。穠愁一度。最難忘。遮燈私語。澹月梨花。借夢來。花邊廊廡。指春衫。淚曾濺處。

菩薩蠻(夜景)

梨花不礙東城月。月明照見空闌雪。雪底夜香微。寒簾拜月歸。錦衾幽夢短。明日南堂宴。宴
罷小樓臺。春風來不來。

又(賦玉蕊花)

唐昌觀裏東風軟。齊王宮外芳名遠。桂子典刑邊。梅花伯仲間。籠茸鏤暖雪。鎖細雕晴月。誰
駕七香車。綠雲飛玉沙。

又(賦輭香)

廣寒夜搗玄霜細。玉龍睡重癡涎墜。鬪合一團嬌。假人暖欲消。心情雖軟弱。也要人搏擲。寶
扇莫驚秋。班姬應更愁。

賀新郎

花落臺池靜。自春衫閒來。老了舊香荀令。酒旣相違詩亦可。此外雲沈夢冷。又催喚官河蘭艇。輒岸煙霏吹不斷。望樓陰欲帶朱橋影。和草色。入輕暝。裙邊竹葉多應賸。怪南溪見後無箇再來芳信。蝴蝶一生花裏活。難制竊香心性。便有段新愁隨定。落日年年宮樹綠。墮新聲玉笛。西風勁。誰伴我。月中聽。

又

綠障南城樹。有高樓銜城樓下。芰荷無數。客自倚闌魚亦避。恐是持竿伴侶。對別浦扁舟容與。楊柳影間風不到。倩詩情飛過鴛鴦浦。人正在。斷腸處。兩山帶著冥冥雨。想低簾短額。誰見恨時眉嫵。別爲清尊眠錦瑟。怕被歌留愁住。便欲趁採蓮歸去。前度劉郎雖老矣。奈年來猶道多情句。應笑殺。舊鷗鷺。

又

鵲翅西風淺。乍疎雲垂幔。近月銀鉤將捲。天上應閒支機石。前度芳盟誰踐。便好織回文錦獻。乞得穠歡今夜裏。算盈盈一水會何遠。甯不會。暗相見。綵樓吹斷閒針線。想幽情嫩約。別有蘇庭花院。青鳥沈沈音塵絕。煙鎖蓬萊宮殿。漸木杪參旗西轉。不怕天孫成間阻。怕人間薄倖心腸變。又學得。易分散。

又(六月十五日夜西湖月下)

同住西山下。是天地中間。愛酒能詩之社。船向少陵佳處放。塵世必無知者。暑不到雪宮風榭。楚竹忽然呼月上。被東西幾葉雲縈惹。雲散去。笑聲罷。清尊莫爲嬋娟瀉。爲狂吟醉舞。毋失晉人風雅。踏碎橋邊楊柳影。不聽漁樵閒話。更欲舉空杯相謝。北斗以南如此幾。想吾曹便是神仙也。問今夜是何夜。

又(湖上高賓王趙子楚同賦)

西子相思切。委蕭蕭風裳水佩。照人清越。山染蛾眉波曼睩。聊可與之娛悅。便莫賦湘妃維襪。怕見綠荷相倚恨。恨白鷗占了涼波闊。揀涼處。放船歇。道人不是塵埃物。縱狂吟魂魄。吹亂一巾涼髮。不覺引杯澆肺渴。正要清歌駭發。更坐上其人冰雪。截取斷虹堪作釣。待玉匳今夜來時節也。勝釣石城月。

夜合花(賦笛)

冷截龍腰。偷拏鸞爪。楚山長鎖秋雲。梅華未落。年年怨入江城。千嶂碧。一聲清。杜人間兒女簫笙。共淒涼處。琵琶溢浦。長嘯蘇門。當時低度西鄰。天澹闌干欲暮。曾賦高情。子期老矣。不堪帶酒重聽。纖手靜。七星明。有新聲應更魂驚。夢回人世。寥寥夜月。空照天津。

又

柳鎖鶯魂。花翻蝶夢。自知愁染潘郎。輕衫未攬。猶將淚點偷藏。念前事、怯流光。早去春窺酥雨。池塘向銷凝裏。梅開半面。情滿徐妝。風絲一寸柔腸。曾在歌邊惹恨。燭底縈香。芳機瑞錦。如何未織鴛鴦。醉扶人、月依牆。是當初誰敢疎狂。把閒言語。花房夜久。各自思量。

留春令（金林檎詠）

秀肌豐。靨韻多。香足綠勻紅注。翦取東風入金盤。斷不買臨邛賦。宮錦機中春富裕。勸玉環休妬。等得明朝酒消時。是閒澹、雍容處。

又（詠梅花）

故人溪上。挂愁無奈。煙梢月樹。一涓春水點黃昏。便沒頓、相思處。曾把芳心深相許。故夢勞詩苦。聞說東風亦多情。被竹外、香留住。

瑞鶴仙

杏煙嬌溼鬢。過杜若汀洲。楚衣香潤。回頭翠樓近。指鴛鴦沙上。暗藏春恨。歸鞭隱隱。便不念芳盟未穩。自簫聲吹落雲東。再數故園花信。誰問聽歌窗罅。倚月釣闌。舊家輕俊。芳心一寸。相思後。總灰盡。奈春風多事。吹花搖柳。也把幽情喚醒。對南溪桃萼翻紅。又成瘦損。

又（賦紅梅）

館娃春睡起。爲發妝酒暖。臉霞輕膩。冰霜一生裏。厭從來冷澹。粉腮重洗。胭脂暗試。便無限芳

穠氣味。向黃昏竹外寒深。醉裏爲誰偷倚。嬌媚春風模樣。霜月心腸。瘦來肌體。孤香細細。吹夢到杏花底。被高樓橫筦。一聲驚斷。卻對南枝灑淚。漫相思。桃葉桃根。舊家姊妹。

點絳脣

花落苔香斷。無人肯行。鷓鴣晚風翻繡。吹醒東窗酒。獨臥氈氍。明月知人瘦。香消後。亂愁依舊。開口胡酥手。

又（六月十四夜與社友泛湖過四隴橋已子夜矣）

山月隨人翠嶺分。破秋山影。釣船歸盡。橋外詩心迴。多少荷花。不蓋鴛鴦冷。西風定。可憐潘鬢。偏浸秦臺鏡。

青玉案

蕙花老盡離騷句。綠染徧江頭樹。日午酒消聽驟雨。青榆錢小。碧苔錢古。難買東君住。官河不礙遺鞭路。被芳草將愁去。多定紅樓簾影暮。蘭燈初上。夜香初炷。猶自聽鸚鵡。

浣溪沙

不見東山月露香。姚家借得小芬芳。亂鶯隨趁過宮牆。香珀碾花嬌有意。綠茸繡葉澀無光。御封春酒幾時嘗。

蝶戀花

二月東風吹客袂。蘇小門前。楊柳如腰細。蝴蝶識人遊冶地。舊曾來處花開未。幾夜湖山生
夢寐。評泊尋芳。只怕春寒裏。今歲清明逢上巳。相思先到灑裙水。

臨江仙

草脚青回細膩。柳梢綠轉條苗。舊遊重到合魂銷。棹橫春水渡。人凭赤闌橋。歸夢有時曾見。
新愁未肯相饒。酒香紅被夜迢迢。莫教無用月來照。可憐宵。

又

倦客如今老矣。舊時不奈春何。幾曾湖上不經過。看花南陌醉。駐馬翠樓歌。遠眼愁隨芳草。
湘裙憶著春羅。枉教裝得舊時多。向來簫鼓地。猶見柳婆娑。

又(閨思)

愁與西風應有約。年年同赴清秋。舊遊簾幕記揚州。一燈人著夢。雙雁月當樓。羅帶鴛鴦塵
暗澹。更須整頓風流。天涯萬一見溫柔。瘦應因此瘦。羞亦爲郎羞。

漢宮春

(友人與星娘雅有舊。分別去則黃冠矣。托予寄情。)

花隔東垣。詠燕臺秀句。結帶謀歡。匆匆舊盟有限。飛夢重關。南塘夜月。照湘琴。別鶴孤鸞。天便
遣清愁易長。春衣常恁香寒。唐昌故宮何許。頓翦霞裁霧。擺落塵緣。一聲步虛婉婉。雲駐天
壇。淒涼故里。想香車不到人間。羞再見東陽帶眼。教人依舊思凡。

蘭陵王(南湖同碧蓮見寄走筆次韻)

漢江側。月弄仙人珮色。含情久。搖曳楚衣。天水空濛染嬌碧。文漪鏡影織。涼骨。時將粉飾。誰曾見。羅襪去時。點點波間冷雲積。相思舊飛鷁。漫想像風裳。追恨瑤席。涉江幾度和愁摘。記雪映雙腕。刺縈絲縷。分開綠蓋素袂。溼放新句吹入。寂寂。意猶昔。念淨社因緣。天許相覓。飄蕭羽扇。搖團白。屢側臥尋夢。倚闌無力。風標公子。欲下處似認得。

風入松(茉莉花)

素馨拊萼太寒生。多翦春冰。夜深綠霧侵涼月。照晶晶。花葉分明。人臥碧紗幮淨。香吹雪練衣輕。頻伽脚得墮南薰。不受纖塵。若隨荔子華清去。定空埋身外芳名。借重玉爐沈炷。起予石鼎湯聲。

隔浦蓮

紅塵飛不到處。此地知無暑。亂竹分幽徑。虛堂中。自回互。陰壑生暗霧。飛泉注。氣入閒尊俎。快風度。齊宮楚榭。如今空鎖煙樹。何人伴我。夢賦雪車冰柱。惟有蟬聲助冷語。驚寤。飛雲來獻涼雨。

又(荷花)

洛神一醉未醒。俯鑑窺紅影。萬綠森相衛。西風靜。不放冷。侵曉鷗夢穩。非塵境。棹月香千頃。錦

機靚。亭亭不語。多應嗔賦玉井。西湖遊子。慣識雨愁煙恨。只恐吳娃暗折贈。耿耿。柔絲容易縈損。

鳳來朝（五日感事）

暈粉就妝鏡。掩金閨。綵絲未整。趁無人學指鴛鴦頸。恨誰踏。蘇花徑。一夢蒲香葵冷。墮銀瓶。脆繩挂井。扇底并團圓影。只此是沈郎病。

玉簫涼

秋是愁鄉。自錦瑟斷絃。有淚如江。平生花裏活。奈舊夢難忘。藍橋雲樹正綠。料抱月幾夜眠香。河漢阻。但鳳音傳恨。闌影敲涼。新妝。蓮嬌試曉。梅瘦破春。因甚卻扇臨窗。紅巾銜翠翼。早弱水茫茫。柔指各自未翦。問此去莫負王昌。芳信準。更敢尋紅杏西廂。

鵲橋仙（七夕舟中）

河深鵲冷。雲高鸞遠。水珮風裳縹緲。卻推離恨下人間。第一個黃昏過了。舟行有限。愁來無限。去去長安漸杳。應將巧思入相思。覺淚比銀灣較少。

湘江靜

暮草堆青雲。浸浦記匆匆。倦篙曾駐。漁榔四起。沙鷗未落。怕愁沾詩句。碧袖一聲歌。石城怨西風。隨去。滄波蕩晚。菰蒲弄秋。還重到。斷魂處。酒易醒。思正苦。想空山。桂香懸樹。三年夢冷。孤

吟意短。屢煙鐘津鼓。屢齒厭登臨。移橙後幾番涼雨。潘郎漸老。風流頓減。閒居未賦。

玲瓏四犯

雨入愁邊。翠樹晚無人。風葉如翦。竹尾通涼。卻怕小簾低捲。孤坐便怯詩慳。念俊賞舊會題偏。更暗塵偷鎖鸞影。心事屢羞團扇。賣花門館。生秋草。悵弓彎。幾時重見。前歡盡屬風流夢。天共朱樓遠。聞道秀骨病多。難自任從來恩怨。料也和前度。金籠鸚鵡。說人情淺。

又（京口寄所思）

闊甚吳天。頓放得江南。雖緒多少。一雨爲秋。涼氣小窗先到。輕夢聽徹風蒲。又散入楚空清曉。問世間愁在何處。不離澹煙衰草。簾紋獨浸芙蓉影。想淒淒欠郎偎抱。卽今臥得雲衣冷。山月仍相照。方悔翠袖易分。難聚有玉香花笑。待雁來。先寄新詞歸去。且教知道。

八歸

秋江帶雨。寒沙縈水。人瞰畫閣愁獨。煙蓑散響驚詩思。還被亂鷗飛去。秀句難續。冷眼盡歸圖畫上。認隔岸。微茫雲屋。想半屬漁市樵村。欲暮競燃竹。須信風流未老。憑持酒。慰此淒涼心目。一鞭南陌。幾篙官渡。賴有歌眉舒綠。只匆匆眺遠。早覺閒愁挂喬木。應難奈。故人天際。望徹淮山。相思無雁足。

過龍門

梅溪詞

一帶古苔牆。多聽寒螿。篋中針線早銷香。燕尾寶刀窗下夢，誰翦秋裳。宮漏莫添長。空費思量。鴛鴦難得再成雙。昨夜楚山花簾裏，波影先涼。

又（春愁）

醉月小紅樓。錦瑟筵篴。夜來風雨曉來收。幾點落花饒柳絮，同爲春愁。寄信問晴鷗。誰在芳洲。綠波甯處有蘭舟。獨對舊時攜手地，情思悠悠。

玉蝴蝶

晚雨未摧宮樹。可憐閒葉，猶抱涼蟬。短景歸秋，吟思又接愁邊。漏初長，夢魂難禁。人漸老，風月俱寒。想幽歡，土花庭甃，蟲網闌干。無端。啼蛄攪夜，恨隨團扇，苦近秋蓮。一笛當樓，謝娘懸淚立風前。故園晚強留詩酒，新雁遠不致寒暄。隔蒼煙，楚香羅袖，誰伴嬋娟。

齊天樂（白髮）

秋風早入潘郎鬢。斑斑遽驚如許。暖雪侵梳，晴絲拂領。栽滿愁城深處。瑤簪漫妬。便羞插宮花，自憐衰暮。尙想春情，舊吟淒斷茂陵女。人間公道惟此。歎朱顏也恁容易墮去。湮了重緇，搔來更短。方悔風流相悞。郎潛幾縷。漸疎了銅駝。俊遊儔侶。縱有豔豔，奈何詩思苦。

又（秋興）

闌干只在鷗飛處。年年怕吟秋興。斷浦沈雲，空山挂雨。中有詩愁千頃。波聲未定。望舟尾拖涼。

渡頭籠暝。正好登臨。有人歌罷翠簾冷。悠然魂墮故里。奈閒情未了。還被吹醒。拜月虛簷。鴛鴦
蛩壤砌。誰復能憐。嬌俊憂心耿耿。寄桐葉芳題。冷風新詠。莫遣秋聲。樹頭喧夜永。

又（賦橙）

犀紋隱隱爲黃嫩。籬落翠深偷見。細雨重移。新霜試摘。佳處一年秋晚。荆江未遠。想橘友荒涼。
木奴嗟怨。就說風流。泥來趁蟹螯健。并刀寒映素手。醉魂沈夜飲。會倩排遣。沆瀣含酸。金
嬰裏玉。藪藪吳鹽輕點。瑤姬齒軟。待惜取團圓。莫教分散。入手溫存。帕羅香自滿。

又（湖上卽席分韻得羽字）

鴛鴦拂破蘋花影。低低趁涼飛去。畫裏移舟。詩邊就夢。葉葉碧雲分雨。芳游自許。過柳影閒波。
水花平渚。見說西風。爲人吹恨上瑤樹。闌干斜照未滿。杏牆應望斷。春翠偷聚。淺約揆香。深
盟搗月。誰是窗間青羽。孤筇幾柱。問因甚參差。暫成離阻。夜色空庭。待歸聽俊語。

又（中秋宿真定驛）

西風來勸涼雲去。天東放開金鏡。照野霜凝。入河桂溼。一一冰壺相映。殊方路永。更分破秋光。
盡成悲境。有客躊躇。古庭空自弔孤影。江南朋舊在許。也能憐天際。詩思誰領。夢斷刀頭書。
開蠶尾。別有相思隨定。憂心耿耿。對風鵲殘枝。露蛩荒井。斟酌姮娥。九秋宮殿冷。

燕歸梁

楚夢吹成樹外雲。乍雁影斜分。黃花心事一簾塵。但頻憶、小腰身。今宵素壁冰絃冷。怕彈斷、沈郎魂。秋衣因甚滿愁痕。是干預、幾黃昏。

又

獨臥秋窗桂未香。怕雨點飄涼。玉人只在楚雲旁。也著淚、過昏黃。西風今夜梧桐冷。斷無夢、到鴛鴦。秋鉦二十五聲長。請各自、奈思量。

月當廳

白壁舊帶秦城夢。因誰拜下。楊柳樓心。正是夜分。魚鑰不動香深。時有露螢自照。占風裳。可喜影歎金。坐來久。都將涼意盡付沈吟。殘雲事緒無人捨。恨匆匆。藥娥歸去難尋。綴取霧窗。會唱幾拍清音。猶有老來印愁處。冷光應念雪翻簪。空獨對西風緊。弄一井桐陰。

秋霽

江水蒼蒼。望倦柳愁荷。共感秋色。廢閣先涼。古籬空暮。雁程最嫌風力。故園信息。愛渠入眼南。山碧。念上國。誰是鱸鱸江漢未歸客。還又歲晚。瘦骨臨風。夜聞秋聲。吹動岑寂。露蛩悲清燈。冷屋。翻書愁上鬢毛白。年少俊遊。渾斷得。但可憐處。無奈苒苒魂驚。採香南浦。翦梅煙驛。

滿江紅（中秋夜湖）

萬水歸陰。故潮信盈虛因月。偏只到涼秋半破。鬪成雙絕。有物揩磨金鏡淨。何人拏攬銀河決。

想子胥今夜見嫦娥。沈冤雪。光直下。蛟龍穴。聲直上。蟾蜍窟。對望中天地。洞然如刷。激氣已能驅粉黛。舉杯便可吞吳越。待明朝說似與兒曹。心應折。

又(書懷)

好領青衫。全不向詩書中得。還也費區區造物。許多心力。未暇買田清潁尾。尙須索米長安陌。有當時黃卷滿前頭。多慚德。思往事。嗟兒劇。憐牛後。懷雞肋。奈稜稜虎豹。九重先隔。三徑就荒秋。自好。一錢不直貧相逼。對黃花常待不吟詩。詩成癖。

又(九月二十一日出京懷古)

緩轡西風。歎三宿遲遲行客。桑梓外。鋤耨漸入。柳坊花陌。雙闕遠。騰龍鳳影。九門空鎖。鴛鴦翼。更無人。擷笛傍宮牆。苔花碧。天相漢。民懷國。天厭虜。臣離德。趁建瓴一舉。并收鼉極。老子豈無經世術。詩人不預平戎策。辨一襟風月。看昇平。吟春色。

戀繡衾

吳梅初試澗谷春。夜幽幽。江雁叫雲。人正在。孤窗底。被穢愁。醜破醉魂。雨窗只剩殘燈影。伴羅衣無限淚痕。瘦骨怕。紅綿冷。說年時。斗帳夜分。

又

黃華驚破九日愁。正寒城。風雨怨秋。愁便是秋心也。又隨人來到畫樓。因緣幸自天安頓。更

題紅不禁御溝待寫與相思話爲怕奴憔悴且休。

又（席上夢錫漢章同賦）

天風入扇吹苧衣。小紅樓夜氣正微。有人在冰絃外。水精簾花影自移。陽臺只是虛無夢。便不成涼夜。誤伊想閒了。瑤璃簾。就一身明月伴歸。

換巢鸞鳳（梅意○花庵作春情）

人若梅嬌。正愁橫斷塢。夢繞谿橋。倚風融漢粉。坐月怨秦簫。相思因甚到纖腰。定知我今無魂可銷。佳期晚。漫幾度淚痕相照。人悄。天眇眇。花外語香。時透郎懷抱。暗握菱苗。乍嘗櫻顆。猶恨侵階芳草。天念王昌。忒多情。換巢鸞鳳教偕老。溫柔鄉。醉芙蓉。一帳春曉。

惜奴嬌

香剝酥痕。自昨夜春愁醒。高情寄冰橋雪嶺。試約黃昏。便不悞春昏信。人靜。倩嬌娥留連秀影。吟鬢簪香已斷了。多情病。年年待將春管領。鏤月描雲。不枉了閒心性。漫聽誰敢把紅顏比並。

龍吟曲（卽水龍吟○問梅劉寺）

夜寒幽夢飛來。小梅影下東風曉。蝶魂未冷。吾身良是。悠然一笑。竹杖敲苔。布鞵踏凍。歲常先到。傍蒼林卻恨。儲風養月。須我輩。新詩弔。永以南枝爲好。怕從今逢花漸老。愁消秀句。寒回

斗酒春心多少。之子逃空。伊人遯世。又還驚覺。但歸來對月。高情耿耿。寄白雲杪。

又(雙)

夢回虛白初生。便疑冷月通窗戶。不知夜久。都無人見。玉妃起舞。銀界回天。瓊田易地。晃然非故。想兒童健意。生愁霽色。情頻在。窺簾處。一片樵林釣浦。是天教王維畫取。未知授簡。先將高興。收歸妙句。江路梅愁。灞陵人老。又騎驢去。過章臺記得。春風乍見。倚簾吹絮。

又(陪節欲行留別社友)

道人越布單衣。興高愛學蘇門嘯。有時也伴。四佳公子。五陵年少。歌裏眠香。酒酣喝月。壯懷無撓。楚江南。每爲神州未復。闌干靜。慵登眺。今日征夫在道。敢辭勞。風沙短帽。休吟稷穗。休尋喬木。獨憐遺老。同社詩囊。小窗針線。斷腸秋早。看歸來幾許。吳霜染鬢。驗愁多少。

鷓鴣天

睡袖無端幾摺香。有人丹臉可占霜。半窗月印梅猶瘦。一律竝笙夜正長。情豔豔。酒狂狂。小屏誰與畫鴛鴦。解衣恰恨敲金釧。驚起春風傍枕囊。

又(燈市書事)

御路東風拂醉衣。賣燈人散燭籠稀。不知月底梅花冷。只憶橋邊步襪歸。閒夢淡。舊游非。夜深誰在小簾幃。望兒兒下團爐坐。明處將人立地時。

又

搭柳闌干倚佇頻。杏籠蝴蝶繡牀春。十年花骨東風淚。幾點螺香素壁塵。簾外月。夢中雲。秦樓楚殿可憐身。新愁換盡風流性。偏恨鴛鴦不念人。

又（衛縣道中有憫其人）

雁足無書古塞幽。一程煙草一程愁。帽簷塵重風吹野。帳角香銷月滿樓。情思亂。夢魂浮。綉裙多憶弊貂裘。官河水靜闌干暖。徒倚斜陽怨晚秋。

惜黃花（九月七日定興道中）

涵秋寒渚染霜丹。樹尚依稀。是來時夢中行路。時節正思家。遠道仍懷古。更對著滿城風雨。黃花無數。碧雲欲暮。美人兮。美人兮。未知何處。獨自捲簾櫺。誰爲開尊俎。恨不得御風歸去。

玉燭新

疎雲縈碧岫。帶晚日搖光。半江寒皺。越溪近遠。空頻向。過雁風邊回首。酸心一縷。念水北尋芳歸後。輕醉醒。隄月籠沙。鞍鬆寶輪飛驟。秦樓屢約芳春。記扇背題詩。帕羅沾酒。瘦愁易就。因驚斷夢裏桃源難又。臨風話舊。想日暮梅花孤瘦。還靜倚修竹相思。盈盈翠袖。

一翦梅

誰寫梅谿字字香。沙邊幽夢。常恁芬芳。不如花解伴昏黃。只怕東風吹斷人腸。小閣無燈月

漫窗香吹羅袖。酒映宮妝。如今竹外怕思量。谷裏佳人。一片冰霜。

又(追感)

秦客當樓泣鳳簫。宮衣香斷。不見纖腰。隔年心事又今宵。折盡冰絃。何用鸞膠。些子輕魂幾度銷。蘭騷惹些。無計重招。東窗一段月華嬌。也帶春愁。飛上梅梢。

醉落魄

鴛鴦意愜。空分付有情眉睫。齊家蓮子黃金葉。爭比秋苔。靴鳳幾番躡。牆陰月白花重疊。匆輒語。屢驚怯。宮香錦字將盈篋。雨長新寒。今夜夢魂接。

又(浙江送人時子振之官越幕)

江痕妥貼。日光熨動黃金葉。闌干直下愁相接。一朵紅蓮。飛上越人楫。鯉魚波上丁寧切。詩筒如綫不曾別。明年好箇春風客。五鷄交飛。身在玉皇闕。

醉公子(詠梅寄南湖先生)

神仙無臯澤。瓊裾珠珮。卷下塵陌。秀骨依依。誤向山中得。與相識。溪岸側。倚高情。自鎖煙翠。時點空碧。念香襟沾恨。酥手翦愁。今後夢魂隔。相思暗驚清吟客。想玉照堂前樹。三百雁翅霜。輕鳳羽寒深。誰護春色。詩鬢白。總多因。水村攜酒。煙墅留屐。更時帶明月同來。與花爲表德。

步月

翦柳章臺。問梅東閣。醉中攜手初歸。逗香簾下。璀璨鏤金衣。正依約、冰絲射眼。更在苒蟾玉西。
飛。輕塵外。雙鴛細蹙。誰賦洛濱妃。霏霏紅霧。繞步搖。共鬢影吹入花園。管絃將散。人靜燭籠
稀。泥私語香櫻乍破。怕夜寒羅襪先知。歸來也。相偎未肯入重幃。

梅溪詞跋

余幼讀雙雙燕詞。便心醉梅溪。今讀其全集。如醉玉生春。柳髮梳月等語。則柳昏花暝之句。又不足多矣。姜白石稱其奇秀清逸。有李長吉之韻。蓋能融情景於一家。會句意於兩得。豈易及耶。湖南毛晉識。

宋六十一名家題